

## 楊黃美幸大出手做國民外交！

十二月初九，是 Chhe-khoh (捷克) 前總統 Habie (哈維爾) 過身九週年紀念日，伊是天鵝絨革命的思想家之一，1993 年到 2003 年間擔任 Chhe-khoh (捷克) 共和國總統。落任後隔轉年的 2004 年有來臺灣訪問，幾遍佇聯合國替台灣講話。為 tiòh 感念 Habie 前總統對台灣、Chhe-khoh 兩國關係的貢獻，楊黃美幸 (楊黃美幸) 特別 tī chit 工宣布，買一台 Phòetòhu 鋼琴送 hō Chhe-khoh 首都 Pulaha (布拉格) 的音樂廳，做一件成功的國民外交。

楊黃美幸 (楊黃美幸) 贈送 chit 台鋼琴有幾層的意義。第一，今年九月 Chhe-khoh 國會議長 chhōa 一陣九十人團訪問台灣，引起中國不滿，隨時 kā 原本講好的鋼琴訂單取消掉，Chhe-khoh 上有名的鋼琴製造商 Phòetòhu 無代無誌掃 tiòh 風颳尾，楊黃美幸 (楊黃美幸) 一直替 in 抱不平。第二，聽講 chit 間 Chhe-khoh 國寶級的 Phòetòhu 鋼琴公司用五年的時間，特別打造一台慶祝創業 150 週年的鋼琴，koh 聽講 in 誠希望 chit 台鋼琴會 tàng 留佇 Chhe-khoh，第三，猶 koh 聽講首都 Pulaha 的 Lutohu 音樂廳足希望會 tàng 有 chit 台紀念鋼琴。楊黃美幸 (楊黃美幸) kah 厝裡的人參詳了後，決定買來送 hō 音樂廳。第四，足抵好 chit 台紀念鋼琴的價數 kah 九月 hō 中國取消訂單的金額新台幣六、七百萬差不多平濟，mā 算是台灣還 Chhe-khoh 的 Phòetòhu 鋼琴公司一個補償。

當然，上重要的意義是紀念 Chhe-khoh 前總統 Habie (哈維爾) 過身九週年紀念日，感謝伊在生對台灣的友好幫忙，向伊致敬。

有人會問講楊黃美幸 (楊黃美幸) 是啥物人？其實伊是一個普通人，伊去美國留學了後，因為熱心關心台灣煞 hông 列作烏名單，伊 bat hông 選作「全美台灣同鄉會」會長，烏名單解除了後才會 tàng 轉來台灣，佇民進黨中央黨部擔任國際事務部主任，民進黨阿扁總統執政了後，bat 作過外交部研究設計委員會主委、僑務委員會副委員長等職務。而後 bat 擔任台灣民主基金會副執行長，蔡英文總統聘請伊擔任無任所大使幾年後辭掉。現此時是陳文成博士基金會董事長、國際自由婦女聯盟副主席、亞太自由婦女協會理事長。

有聽一個戇人講，捐一台鋼琴算作啥物國民外交？伊 m̄ 知影，對外國人一個 tìm 頭、一個微微仔笑、任何友好的表現攏是國民外交。新台幣六、七百萬，mài 講是一個國家，對一個財團抑是一個好額人來講 mā 是小錢。但是對一個平民百姓來講，是一條大條錢，新聞報導講伊 kah 厝裡的人參詳才決定的，看出台灣人的好女德。楊黃美幸 (楊黃美幸) 實在值得咱大大 kā 說謝 kah 謳佬！

(201225)

註：楊黃美幸 (楊黃美幸) 請唸兩遍，黑體字唸華語 捷克 布拉格 請唸華語

